

四庫全書

集部

欽定四庫全書

粵西詩載卷八

桂林府通判汪森編

七言古

永陽看山

楊 敷

癡人最愛山常恨看不足銓官置我山縣中那知正中  
吾之欲三槌衙鼓罷庭院真幽獨文書連月稀印匣經  
旬束頽然隱几情不舒鶴氅華陽出門屋但見遠山縹

綳螺子青近山參差銅花綠峻峰如削插蒼穹懸崖似  
墜壓坤軸層巒疊嶂攢碧蓮瀑布懸泉垂白玉石者幻  
砌煩神工土者坡陀間修竹一高一下虬龍行一蹲一  
踞熊羆伏或如鸞或如鸞或如天馬行空聊駐足岫出  
雲兮去為霖雲歸岫兮暗林木文禽來往似依屏麋鹿  
攸馴類家畜殊形異狀世豈多晴雨昏朝皆可目方期  
半嶺舒清嘯已著芒鞋歷雲麓踞白石兮呼清風撫長  
松兮矚幽谷選杖履兮登絕頂喜西方兮在所矚望美

人兮不來使我心兮傷觸山兮山兮酌汝酒一卮僻處  
遐荒空自竒呼童泚筆聊題破定有知音相繼之

招民詞

陳璉

民歸來新皇雨澤遍九垓官府恤民如恤孩去逆效順  
毋疑猜

民歸來幾遭標掠空衆財今得撫安無後災生意還從  
勤裏回

民歸來室廬或火或傾頽增新葺舊亦易哉翦茅伐竹

皆爾材

民歸來二年不種田蕪菜因風一火俱成灰春來雨足  
禾易栽

民歸來舊業拋荒真可哀  
苧麻根在不須栽只用勤勤  
芟草萊

橫州道中見日光識喜

潘希魯

蒼梧南來一千里扁舟牽挽窮山水蠻烟瘴雨動決旬  
長晝冥冥無午已僕夫泥塗簑笠作衣青蕉裹飯不療饑

蕭條行李潤生醖寂寞炊竈寒無輝愁予兀坐蓬窓下  
忽覩陽光射雲罅千林生色嵐霧開須臾變幻疑昏夜  
人言此方風土乖冬雨苦久晴頗佳乍晴不堪還乍熱  
鬱蒸癘氣生陰厓我望青天再下拜太陽高照元無外  
最爾遐荒特可憐覆盆何礙乾坤大

送同寅章樸菴謫判蒼梧

萬鏜

章樸菴目近視髮低垂衣冠不詭流俗宜胸藏天下奇  
鬱如翠竹蒼梧出澗壑脫去千葩萬卉之塵安精金在

鎔玉藏璞欲名其器人莫能知利刃發硎盤錯解文辭  
落筆風雲隨西臺聲價邁等夸策駑厲鈍真吾師世事  
巧與人參差一朝遠適梧水涯立馬相看欲發遲察君  
顏面無幾微退之道顯潮州謫夔峽曾裨杜老詩賢哲  
從來每若此造化有意非吾欺楓山先生家法在請以  
予言歸質之行道奚論身遠邇濟時豈問官崇卑甘雨  
覃敷瘴烟洗文星煥發宿霧披吾皇明見萬里外遠臣  
進拔寧終遺廟堂採取作梁棟霄漢飛騰見羽儀願言

此去加護持晨餐夕寢無愆時慰我蒼茫雲樹思

金甌完

戴欽

金甌完皇圖寬炎天桂嶺皆衣冠臣赴赴師桓桓秉王  
猷孰于盤時雨降民大懽海不波狼膽寒明珠翡翠來  
長安地平天成帝業難小臣撰頌萬世大觀

題桂南閱秀送陳掌教

夏良勝

蒲陽十年磨桂斧盱江十年樵桂楚鋒霜落手眼星光  
桂林一入爭先覩莫惜桂林小君用知君借與桂林重



狀元峰頭應有人明遠樓中學臧夢君不見張曲江柳  
愚溪宜城寄迹君須知萬金不愛打碑楮都付來人公  
是非又不見思駿馬買駿骨許多朽瘠封洼窟孫陽一  
上黃金臺桃花叱撥驚駕駘明年俊又紆忠懷隨君儉  
策升堯階

劍歌行發桂林作

黃佐

對酒劍歌行路難墨雲當天凝作山渴龍怒卷海濤立  
空林颼颼如人入跳珠白雨騰玄間迴看平陸皆成灘

僕夫戒予行莫急倉皇中道何嗟及停車拱極之飛樓  
紫騮不嘶旌旆愁跋烏揚光忽垂地驛吏衝泥亦來至  
翼子乘霄上前途斧薪作糜勤僕夫逡巡飯罷出林薄  
麥雉引雛鳴角角

都城引送陳七表兄之橫浦

都城十月塵如山朔風吹雪行路難侵晨我已駕馬出  
薄暮始隨棲鳥還下馬入門見兄到張燈與兄拂巾帽  
三年不得奉顏色一觴且共開懷抱兄之大父我外翁

聲價昔震蓬萊宮家有圖書出秘府兄能取次藏胸中  
此時吐露惟衷款笑談衮衮良夜短促膝翻愁朱火盡  
螢窓忽見金波滿相看本是同根生世態悠悠安足評  
天涯未易輸肝肺海內誰云皆弟兄我隨玉節別兄去  
荆門夢結烟中樹隴頭兩見秋雲飛又向都城得相聚  
都城閣道從天開虎豹為關鸞鳳臺簪纓無數不敢到  
兄以材賢長往來兄辭家久常思母天遣為丞向橫浦  
萬樹梅花導板輿一水何曾隔鄉土兄今十月出都城

風景如前非合并孤舟明日河橋路微雨蕭蕭無限情

送洪方伯玉方之任廣西

程旦

東風吹雲日杲杲金馬關西春色早垂楊嫋嫋拂長亭  
芳草萋萋迷古道古道長亭日送行垂楊芳草總含情  
歌聲婉麗春鶯囀酒色依微綠蟻清酒香歌艷人如堵  
魯陽揮戈日亭午長空浩浩片雲飛故國中原渺何許  
故國思歸未得歸故人臨別重淒其憶昔相逢京路陌  
花間傾蓋披襟期金鞭白馬玉河旁六街九陌翼華廊

粉署春風陪燕集金門曉日接鵷行鵷行瞥眼嗟分翼  
君在江南我江北十載相望參與商竭來一笑頭俱白  
頭白何妨眼更青滇南握手慰平生壯心激烈猶如昔  
異域交情久益傾交久終期依玉樹百年寧耐睽嘉晤  
鶯鳩祇自搶枋榆鵬鵬忽已翔天路天路遥遥那可追  
中年再別情尤悲瘴霧茫茫迷熨道烏鳶跼跼入蠻溪  
熨道蠻溪下桂林武水泠泠非毒淫象郡西來通象譯  
龍江南去聽龍吟使君自是人中英從知百粵憚嚴明

折衝千里惟樽俎作鎮西南仗典刑歡聲載道歌霖雨  
況復南征已罷兵南征兵罷日悠悠逍遙樓上逍遙游  
帝心簡在虛前席佇望歸來壯遠猷勲業終看銘寶鼎  
姓名行見覆金甌蹇予五載滯邊州去住空遺猿鶴羞  
君過辰沅定相憶扁舟子亦下湘流

藤江

李純

天光曉闕東山陰洲嶼欲沒天沈沈桃花已隨夜雨盡  
海鷗不知春水深失穴蛟龍觸山怒此際神驚危砥柱

柳邊舟渡浪停時  
人行未負斜陽暮

龍巷石

巉石粼粼巨江壯  
凌風欲渡鬢髯赤  
貝宮清淚濕羅衣  
複道西風留轍迹  
露肥苔蘚磐石幽  
天光搖落雲不流  
晚涼灑掃石上月  
一絲長繫江聲秋

河池太守行哀故年友江陵何二南

孫羽侯

河池太守歸去來  
青天皎月章華臺  
江魚作鱠松醪酒

銀箏錦瑟聊追陪  
休言金谷繁華逝  
且共柴桑醪酲回  
流觴藉草樂相樂  
登高弔古一徘徊  
蠅營忍逐人間去  
鵬賦還成謫宦哀  
蔡邕有女書堪讀  
伯道無兒天豈猜  
粵人之南蜀西極  
炎雞絮酒填蒿萊  
居者酸心行者哭  
富貴於我何有哉  
即今都官享厚祿  
石渠金屋平明開  
轟雷掣電豈不畏  
一旦沒世同塵埃  
又況朱門生子饒  
不肖金堆玉積等  
浮灰惟有峴山碑  
墮淚千秋萬歲其

崔嵬



鬱林行為何別駕賦

劉黃裳

漢家象郡出炎洲百粵梅花放嶺頭宣威銅柱溪蠻靖  
罷詔珠崖海客愁茫茫月色蒼梧路使君按節三苗度  
回首帆搖淮海波褰帷人識牂牁樹聖朝文物淨華夸  
帝簡循良刺九垂賢名別駕不辭遠手將雨露驂文狸  
猿聲細細驚湘瑟桂樹團團拜舜祠日望九疑雲片片  
回雁峰頭音信斷鵝毛雞骨歲時新桂水人來書寄便  
更有文身作土民翠羽珊瑚多貴珍何郎自是中原最

遙弄清風灑海塵

合江

黃暉

鳴颿蕭瑟癡雲低鷓鴣聲斷春日西狂雷徹底吼到曉  
百川沸與三江齊中流却羨鰲足穩一任旋波虎眼轉  
仙客船如天上坐笑指銀河路不遠

三華山

金翎拍海山鳥鳴寒光拂曙天欲晴溟濛瑞靄灑霏翠  
仰視不見華峰青須臾捲幔山林薄傍柳縈花遶城郭

南山玄豹藏已久文彩斑斑變龍箴

宿靈川呈諸同事

鄭鵬

偶來寄宿靈川城眼前野景宜野情白雲護山曉未起  
蒼苔繡石秋還明獨行忽見碧潭影一曲礙苔滄浪聲  
宦途流轉無定在翻憐聚散如浮萍

送唐僉事之廣西

馬汝驥

青門柳條春欲還錦帆孤飛不可攀問君抗手將何適  
五嶺蠻荒途路艱君子本自朱崖秀畫省年來看草奏

一朝斧鉞出青霄萬里冰霜生白晝楚山盤鬱天冥冥  
越野南連軫翼星暇日褰帷更詞賦雙魚須寄子雲亭

桂嶺吟送汪弘齋僉憲北上

潘恩

桂嶺崢嶸紛插天星巖石洞羅蔥芊諸峰空翠淨如拭  
鍾乳丹砂凝素烟湘流若帶通雲霧三江七澤遙吞吐  
越地猶傳榜枻歌江潭亦著滄浪賦送君高歌酌君酒  
襲襲松風生戶牖臨觴調笑拂吳鉤倚劒歔歔動南斗  
八月燕山天氣清君行定入鳳凰城扶搖萬里橫修翼

早晚瑤臺聽鳳鳴  
鸞羽差池憐遠道  
絨情天末音聲杳  
去去還期嵩洛間  
盈盈共折金光草

灘山篇

灘山截薛天  
門黑巨靈決  
石波濤急  
水怒翻  
驚霹靂飛  
舟行時訝虬龍立  
天吳揮霍颺颺驕  
馮夸錯愕鮫人泣  
滌雲泂雨相因依  
下潦上霧何時晞  
即看猿狖啼榛莽  
況有烏鵲下石圻  
人生蹤迹傷萍梗  
對此潛然賦式微  
身後榮名那復道  
丈夫挂冠苦不早  
鷗鳥相忘海上翁

紫芝高卧南山老

鳴岡亭歌

鳳山壁立桂江傍，層崖列嶂遙相望。  
芙蓉萬疊披雲錦，影落昭潭涵翠光。  
突兀孤亭開壯觀，涼颼飄忽烟嵐散。  
白日相輝石鏡明，青天不動琪花燦。  
朝陽桐樹發新枝，琅玕瓊藥多華滋。  
蒼梧龍去不再返，楚狂之論令心悲。  
饑鳳威垂羞鳥雀，馬能促刺爭葵藿。  
高翔九采離塵紛，音比簫韶滿寥廓。

三峰歌

桂山削出金芙蓉紫雲碧草浮青空中峰委蛇若鳳舉  
左右離立盤雙龍矯矯將軍廊廟姿英聲四十動南維  
星河光搖夜談劒羽帳風清日賦詩樹立竒勲還自許  
高山爭雄氣如虎千載應傳馬伏波朱方銅柱高嵯峨  
弔張將軍

灘江瀟沛山巖薛險地豺狼橫生孽將軍怒賊五嶽傾  
髮指危冠心激烈魯陽麾日黃雲悲手提蛇矛佩明珠

變生流矢壯士摧殘崖碧染長弘血總戎影節江之湄  
洛口勛名侈竒絕探毛索羽數澤空將軍有兒身不滅

桂濱圖為張司業子陽題

廖道南

桂林之山桂濱水激潭激浪靈光紫風洞幽陰竹月斜  
星巖隱映蘿烟起玉堂仙人人中龍張仲孝友稱豪雄  
丘壑情多勞遠夢江湖憂切懸孤忠憶從卜築山水旁  
灘源清淺環草堂獨秀峰迴萬馬驟相思江合雙蛟翔  
秋深桂花滿山樹白石團團白日暮開徑頻棲松菊陰



沿溪還宿芙蓉露向來射策入長安翺飛直奮青雲端  
平仲才華蔚虎豹孟陽詞藻聯鴛鸞石室蘭臺校經史  
縹囊彤管窮終始劉向編摩獨苦心揚雄寂寞探玄旨  
憐予迂野締交盟披圖示我何分明湘流在粵瀟在楚  
天地於人似有情吁嗟乎桂濱自有白龍洞鄂渚亦有  
黃鶴樓黃鶴高飛江漢遠白龍天矯烟雲浮君為白龍  
吟我為黃鶴歌鬱儀結麟奈爾何丈夫有志各努力無  
令歲晚空蹉跎

荒五嶺

袁 袁

荒五嶺抵南交撫黔氓擾夸獠犛犛和瘴癘消越裳來  
重譯遙明珠翡翠貢天朝文犀瑇瑁海賈可招幅員萬  
里仰唐堯

南中作效高逵夫體

僕本橫塘一漁父釣竿三尺常為伍白首惟堪老布衣  
折腰豈願趨官府自從天子放歸吳茅屋荒涼住五湖  
窮巷杜門辭俗客薄田餬口著潛夫誰知世事如翻手

公車誤薦收枯朽富貴功名笑等閒  
東西南北勞奔走  
桂林卑濕已難論  
象郡炎蒸愁殺人  
身在瘴鄉生是寄  
路逢蠻賊死為鄰  
由來青紫非吾意  
封侯拜相英雄事  
裏革都無少壯心  
荷鋤且徇烟霞志  
浮海居夸愧孔丘  
茹芝飲水更何憂  
明朝拂袖還山去  
鴻鵠冥冥不可求

九日虞山宴集短歌行

楊本仁

高天急景萬山陰  
重華古祠秋蕭森  
雲捲夕風月正南  
碧空如掃江沈沈  
把酒都懷帝子靈  
捫河欲寫蒼梧心

桂海無霜雁不來黃華紫萸觸客襟無那高歌落木篇  
露華髣髴影秋千尋此時何人不盡觴橫笛未斷清猿吟  
九疑聖人在何處耳中恍惚聞韶音回首中原萬少北  
龍光正引重華岑將軍撥劍促歸去眼底幽并起萬慮  
粵中歌送沈嶠谷還西粵幕府 蔡汝楠

簫鼓發通津零舟遇故人充省使來自粵溪濱早  
歲青袍同里閭適粵經年不相見落日他時頻夢思春  
風此日增歡戀憶昔明庭徵士時東南貴冑聚京圻不

隨主父紆邊策便學弦高犒晉師  
縮魚衣綉長安陌誰是湘西遠  
行客騷人勝事古來多為問湘中  
定若何蒼梧白雲深杳杳朱袖雲  
和真縹緲江臨桂水暮猿愁嶺  
過熊飛秋雁少岫樹森沈古洞寒  
諸溪迴合萬峰攢平洲堪賦蘋花  
白古廟猶看荔子丹邇來征戰連  
炎海貢錦飛芻競填委馳逐寧違  
幽素懷棲遲不覺星霜改可堪丹  
楫暫時同西歸余亦向江東也知  
桃杏裁天上且歛聲華赴幕中

冬雷行

謝少南

季冬六日次辛丑亢陽回驕北風吼雲氛蔽天朔氣應  
震疊霆車走雷部乍疑灕江連陡傾又如風洞崩其口  
簷窓明滅下掣電屋瓦騰凌激翻斗倉皇籌鼓報四更  
攬衣起坐百感生由來天地貴藏用太和保合歲乃成  
祇今纔見一陽復龍潛蛟蟄韜元精雷乎胡此出地奮  
駭怒宣洩何當平遷人刁騷散華髮三年泥翮滯西粵  
徼域兵戈漫有期朝廷禮樂元無闕自秋天旱不收禾

被野即看多戰骨憂時苦歎宮庾空忍令蒼生受顛越  
今夕何夕仍聞雷眉宇愁封未肯開晶熒自剔短檠燄  
促減遍畫寒爐灰奴斲不奈喚驟醒顧影無語徒徘徊  
雞聲咿喔發遠舍東牖復送朝曦來

抵陽朔有作代東西石侍郎

錢 薇

履新七日灘江征采鷁已指陽朔城迴巒疊嶂視無路  
忽然一轉溪途明鯨甲狼烟雜金鼓巒氛蜚霧昏山程  
峰上何所見咆哮猛虎如掣電江外何所聞四野悽愴

哀猿鳴此亦皇圖入國籍毒瘴絕險何愁人觀風萬里  
乘槎客露冕行春消劍戟春風噓之俗自醇喜見梅花  
驕雪白漁蓑舉網得魚烹樵父刈薪坐雲碧吁嗟人生  
在自得天南地北奚足惜政行民化乃可慰綵毫縱揮  
怡昕夕萬象昭回屬匠手墨池落花浮琥珀我欲報之  
愧瓊瑤對景舒詞達胸臆

江行見兩岬諸山如舞代東陽川侍御

灘江桂楫棹歌催暫解塵氛授酒杯忽覩葱菁環兩岬



誰拈山色入簾來怪哉江水不東向潺潺南瀉蒼梧臺  
使君何日柳州駕弔古懷賢獨相託我欲生翼從君游  
山川環隔安能跨楚粵長途幾千里碧梧翠竹夾江汜  
早見垂垂一樹白知是嶺梅先放蕊安得折來與君賞  
醉舞浩歌月初上金罍相勸不知盡勝地韶光兩相並  
悠然一笑忽下簾星槎猶滯羅田隈

殷司馬平廣西寇歌

王世貞

殷公文武邦之楨不學淵源空有名一歲再遷中執法

兼提六管嶺南兵如雲鵝鵲排千艦五色神羊映百城  
征南將軍不穿札渡瀘相公單白恰軍聲雷動細柳營  
殺氣霜凋大藤峽任是蠻烟開羽扇還留漢雨澆金甲  
狼兵錦鞬綉蝥弧奪得生猺換酒沽早知不殺稱神武  
悔自跳跟作後夫處處春田催布穀朝朝列肆喚提壺  
千秋獲嘉縣重覩伏波不得驕銅柱灘水灘和鏡吹聲  
鬱林花滿旌旗路遙望蒼梧雲正蒼是公功成勒銘處

烏蠻灘

張佳胤

烏蠻灘前石齒齒盤渦轉地驚濤起險絕空傳灩澦堆  
估客帆檣愁欲死萬里江源異域來右出夜郎左交趾  
青天赤日雲四垂點點飛鳶墮深水我本西梁遠道人  
瘴鄉奔逐胡為爾停舟一奠伏波祠丹荔黃蕉前致詞  
英雄心事無今古神物風雲各有時銅柱功名儻難就  
澤車歎段隨所之

送馬明府叔明之桂林靈川

沈明臣

荆雲搖白蒼梧秋荔江水淥天如油鄂侯青雀渺何所

翠被榜人空越謳  
茜裙莎草黃陵女  
舜廟堯山怨春雨  
舊淚猶斑新竹枝  
今月空懸古時樹  
九疑崔嵬白雲間  
洞庭風起波連山  
極目蠻天帝子怨  
斷腸芳草王孫還  
明珠曉濺鮫人室  
哀絃夜鼓湘靈瑟  
往事千年不可知  
青削芙蓉天外出  
重江聯嵐帶青蘿  
瘴烟毒霧浮艸野  
荒荒日落獠人洞  
夸舞蠻謳奈若何  
使君銅章韞玄綬  
漢室循良推卓茂  
不辭五斗迎督郵  
寧為丹砂乞勾漏  
終日鳴琴不下堂  
屏風定取列星郎  
靜窺案牘榕陰綠

退食公庭蕉子黃秋高雁斷衡陽晚萬里題書莫辭懶  
故人江閣楚天高政成無事須強飯

送陳子文之官廣西

張時徹

城中月明齊擊鼓城頭日出朝樹羽駟馬馳驅南楚雲  
嶺猿長嘯炎交雨道傍三月柳如旌攀折殷勤送子行  
白水蒼梧天萬里登臨不厭伏波城

呂光祿席上送崇安丘尹之任柳城

黃姬水

都城一月春風顛仰天縮脚閉戶眠海門片霧吞江柳  
散作千山萬山雨積陰黯黯翳空林餓烏白晝啼愁霖  
裹飯子桑誰過牖壚頭賴飲知章酒酒畔欣逢閩越豪  
自言夙昔神交久一官憔悴家更貧往往新詩播人口  
偉哉光祿大屨材九列之望隆三台乘驄風凜長洲苑  
東甌初試栽花滿同是公門桃李枝余今已作溝中斷  
廿載重逢鬢各絲後來會面安可期徘徊日夕情何極  
銜盃屢換青山色惜別當時已泣然驪駒今復在門前

龍城路遠衡陽外總有音書雁莫傳

送友人之蒼梧

屠應峻

朔風蕭蕭雪作花曉月半壁浮銀沙清輝可贈不可掬  
瓊瑤散漫隨行車上林柳條寒未茁五嶺梅花春正賒  
蒼梧烟煖夜成霧潯陽水明朝絢霞岐路向君稽首別  
遙緘椒醕訊重華

送陳貢士刺上思州

唐順之

陳生磊磊衆所羨十年不遇空彈劍本朝談笑取公卿

豈意逡巡向州縣憶從少小負才華飄飄逸思凌綵霞  
謝朓詩篇差可擬子雲筆札焉足誇終然獻玉遭雙刖  
安事讀書盈五車竭來奔走長安陌人世紛紛笑落魄  
高歌白石夫誰知用盡黃金徒自惜富貴浮雲不可求  
且復低眉從薄遊南望桂林雲氣深瘴雨蠻烟多毒淫  
不辭炎海千重路試取水壺一片心

可菊為蒼梧吳子賦

余世亨

蒼梧美人事幽獨庭除手植千莖菊  
食英酌酒避俗喧



笑傲南山無寵辱適爾羣芳搖落時  
氤氲紅白藹東籬  
閒將白眼看塵世長和淵明歸去辭

火烟石

吳時來

火烟隔江雙巨石十仞僻立江之側  
何處漁翁來收釣  
舉刀砍水水為赤刀尖初閃巖石裂  
刀背纔翻江水咽  
至今巖石如紙平揮毫我欲灑滄瀛  
摩崖不借魯公筆  
跪石恐為蟠溪吟憶昨蹶蹕生煩憂  
每望滄海登高丘  
橫河跨海徒夢想十洲三神難竟遊  
即今繫舸且沈浮

坐向巖頭招白鷗  
白鷗問我誰氏子  
豈亦呂梁觀者水  
銅柱燕然各有投  
何如散髮弄扁舟

粵西山水歌

董傳策

粵西山水甲天下  
蜀中險絕此其亞  
瀧濤飛出水晶宮  
龍齒潺湲舟底窄  
仰視流水一竅通  
衆石尖尖撐太空  
烟嵐直罩星斗落  
目中半是參天峰  
峰勢參天江欲瀉  
懸崖縹緲靈根射  
削如玉笋秋不凋  
突如長鎗鋒倒掛  
巖洞玲瓏何太奇  
訇然中開峙兩儀  
疑有神斧鑿其穴

牽連秘詭光陸離飛雲孤峙控西楚靈鷲盤旋鳥猿舞遊  
覽縱橫不記名大者人傳可歷數桂林城標風洞山石  
壁巉巖大窟園七星巖帶龍淵起隱山六洞間開顏江  
邊復有還珠洞象鼻之山江勢湧從此直下灘江來兩  
涯山石彌江縫江灘閃出鯨鯢蹤歷落灘聲石可春昭  
平南渡龍門險蒼梧瘴沒雲山重潯陽水析藤江浦烏  
蠻灘遙那可渡諸灘捲出邕管平崑崙西接柳慶路聞  
道柳慶路崎嶇峭然天險土荒蕪奇山拔出洞常裂江

道半塞蠻張弧行人操戈出城郭雖有山川難自樂兩  
江左右風不殊炎蒸蛇豕誰運畫憶昔秦漢開邊寰宋  
家設鎮中險艱伏波銅柱標南極武襄勲在崑崙關我  
朝韓公斷藤峽桓桓中丞興廟略諸蠻竦息不敢譁後來  
府江還著脚思田倡亂姚公徂新建撫定降盧蘇借兵  
威平八寨後三十年來寇漸多吁嗟粵山徒聳突江流不  
轉山露骨狼烟日夜起江波誰云靈氣鍾厥物我來遠  
戍作逐臣全生仰沐天王恩殊方豈怪風土惡却憶高

堂玄髮人登臨悵然百感集游子長帶風塵色山自高  
高水自流那堪慰解離人臆披擲不辨馬牛呼猶向江  
山強自娛茲遊奇絕恐難記我作斯歌當畫圖

青山歌

青山高千峰石笋挿層霄青山下江水平鋪村影射青  
山小卷石嶙峋竹啼鳥青山大五象星羅吹響籟青山  
晴波光萬頃盤蛇城青山雨烟靄微茫罩松樹青山風  
蛟龍吼怒凌長空青山月青螺一點銀盤突青山暝漁

歌歛乃搖江鈴青山曉玉露瀼瀼斷林杪青山清一股  
泉飛石上聲青山四時嘗不老遊子天涯覺春好我携  
春色上山來山花片片迎春開仙人雲蓋飄亭子泉水  
之清洵且美我愛泉清濯我纓白雲裊裊銜杯生披雲  
直上崑崙頂鞭龍一決翻滄溟却洗塵氛破炎昊路上  
行人怨芳草

響泉歌

有引

有仙客携琴上青山余因招致亭中面泉而鼓之歎

聲泠然清也聽之者飄飄有凌虛之想爰為作響泉  
歌歌不擇韻隨口而成

春烟澹蕩江波平山石扶搖亭子橫有客携琴山上行  
招致方外同登瀛坐來轉愛春景明二儀懸光白日晴  
原泉混混毓山靈客將振羽遊滄溟臨亭和絃憂以鏗  
春風一曲響泉琴聽之使我心神清忽然萬木皆春聲  
落花游絲如有情林間好鳥相和鳴遊魚出聽大樂成  
高山流水傳遺音覺時觸處道心生堪作羲皇世上人

崑崙歌

送顧侍御  
一貫出巡

崑崙山高控西粵飛蟠千丈何奇絕青峰突出破大荒  
赤螭天矯森石骨氣核橫攢玉碎圓巖泉灣瀉珠流沫  
怪樹枯藤掛老崖雲屏疊斷蚪蛇穴山精嘯風瘴作雨  
箐篁颯沓嵐烟掣枕榔枝暗珊瑚拳荔子花班鷓鴣舌  
陽和偏落四時花鬱蒸不夢三冬雪涼燠我驚變曉昏  
亭午日高雲乍撥羲景依微盪綠鬟蠻疆一望迷丘垤  
瀧練疑摩峭壁牙竅天欲墮盤江髮星躔翼軫古隘關



邕管西迤領方接明都銅柱鎮華夸汴宋醜儂猶宰割  
經略曾標京觀雄奇兵一夜闌南奪至今馬狄並高勲  
八寨還嗣新建烈滄嶼不改戎機銷羣狙跳梁誰式遏  
彌原荒頓轉流移生齒難繁聲教濶使君行部踏春來  
春光縹緲薰颺發繡斧擎翻瘴嶺霞花驄嘶控皇華節  
霜姿只飽苜宿餐滿道清風洗炎熱飄蕭萬里載馳驅  
今古興懷猛吹徹我戎徒慚白面生君巡自憶丹穹闕  
相逢且莫誇壯遊好向明時樹宏業振衣八極被九垓

俯視崑崙成一撮

湘山寺無量壽佛示寂龕

禪家洗心守空寂寺藏猶銜不朽骨衆人競逐法王身  
誰知性去無靈均大化不生亦不滅陰陽變合真活潑  
從來塵劫即菩提莫向浮生空自迷

全州大雨

有引

八月十六日過全州將渡興安斗時久不雨斗苦涸  
惟修遂議登陸業戒人徒矣余怯瘦骨艱行且謂旱

久當雨堅艤舟以待是夜果大雨明旦發舟殊捷惟  
修顧謂曰我夜禱雨隨應余笑曰君欲洗路塵耶雨  
乃為我濟舟耳漫援筆記之

海陽山斷湘灘口何年鑿引成巨斗歷陟千級慎啟封  
我欲渡之苦旱久吳郎此際遽擔簦獨怯病骨猶難守  
纜結枯槎夜向分風雷忽作龍大吼俄頃靈澤翻天瓢  
大江小江鮫石走曉來江浪平秋烟挨柁似飛歡舉酒  
憶昔韓公開嶽雲精誠豈復千穹佑雨乎雨乎端為誰

應遣蒼生年大有

殷石汀學憲邀遊風洞山

巖石高飛挿南斗中開大竅風雷吼風雷吼作蒼烟橫  
曲磴遙撐削壁平使君携我躡霄步飄發羣峰驚指顧  
下瞰灘江泝石流猺吹猿嘯客心愁桂林山水秋自好  
臨觴那用傷懷抱

舟甫泊岬乘興便登青山

九月五日發灘江十月五日來此邦登臨率爾憩山木

遊攬飄然凌石瀧赤幹扶疏禽聒聒白巖蕭颯泉淙淙  
揮鳥走從蒼莽上拔劍坐令鯨鯢降時有清風散烟霧  
人無雅賦開敦龐白雲飛揚望可極浩蕩春風祇滿腔

節婦謠為朱母賦

嗟哉中媾古難哲況也粵徼誰當旌有偉碩人貞以靜  
吾采謠者揚其聲鄧家處子朱家婦相夫以禮無晨鳴  
那期邁閨孀居早誓不重膠鸞匹盟厥孤呱呱方五歲  
躬操績泉課學成貧也堅持儉也適足不復閔遺世情

即今秉節三十載吾友其子朱明卿闇然好修敦古道  
絕迹闕白肩編氓賢書高領遲仕版菽水不厭攻韓檠  
猗今令母往哲婦吾聞鄧族推鄉評亦有鄧室孀一紀  
庶幾追母並蜚英叩忤禍衷欽婦烈逝者白宋妻水清  
尚存斯母振閨範擊節淚墮逐臣纓斯歌或借警偷俗  
嗟爾生不負天非求名嗟爾生不負天非求名

舉人白  
宋妻亦

貞節  
婦

青山風雨同何李二生泛舟出橫槎因成口號

春風吹破青山色春雨茫茫江草碧江濤湧出白蓮花  
沙樹流雲走相射雲中一榜蓬恢恢中有仙人天上來  
神遊八極那可識榜聲搖曳天光開山中居民怪相語  
只今江上多風雨借問郎今渡何處儂亦從之採蘭去  
仙人大笑瞋雙瞳採蘭爾若能相從吾呼江上雨師為  
爾掃江雨吾呼山中風伯為爾驅山風

枕榔行

吾聞南中之產殊不俗乍來此處看枕榔孤根屈起大

於抱挺然中立摩天光瘦如削壁不枝蔓勁如精鐵突  
踉蹌皎如玉樹搖銀海青如琅玕千尺強盤節蕭疎散  
角葉清風吹作虬龍翔厥包綜密木惟喬厥實纍纍森  
相望掀髯夾莖攀其實

枕椰子赤如珊瑚本草謂之馬櫛椰子食之解瘴氣

珊瑚

錯落瀉石梁餐之坐令瘴烟消仙人赤脚神飛揚厥綜

縛之勒不裂

綜勒可作繩廣人以縛巨舶

巨川行邁濟舟航厥木采

之刮弩幹舍矢如破成穿楊仰披廣厦承雨露作箸借  
之堪籌王約之稜尺燦鎮紙卓然不倚稱端方柄之戈



矛激流電斲之拄杖藉扶匡矯矯蒼藤鞭巨石飛星走

兔紛裂裳

木堅可碎石

異哉骨鯁振風概斗爾難攀

木形壁立採者

每緣竹而上

直以剛高標炎海秋復春梓人材之罕不臧況

乃澹然無染破脂韋黃中通理有文章其華不露其中

虛獨行雖峻無他腸復有蒼茫微妙不饑藥

中有黃粉可作飯散

之不饑

黃精之飯勝膏粱曝日蒸之甘且馥令人顏色美

好壽而康吁嗟此物何為者風流曾惱蘇大郎

東坡嘗以枕柳

杖寄張文潛

折簡曳杖誰禁當我來坐嘯枕柳旁脩然擊節

抽扶桑手摩蒼壁晚天柱放歌無乃瘦而狂翻令柔曼  
失傾意嗟爾枕榔生慨慷嗟爾枕榔生慨慷

七星山

盧仲佃

七星之秀伊何者巖峭空曠縣壺天捫蘿援藤上半脊  
梵宮斜立生青烟主人倒屣出迎客把炬照路尋石室  
室中玲瓏開八座天窓高捲呼幻日杖履逍遙解冠服  
蕭然物外人如玉仰看太液流石涎石柱根根垂玉燭  
一山一空曲復曲令人四顧想黃鵠山中棋碁敲石聲


超超城市為蓬瀛遠水入望盤綠墅半空蒼石啼黃鶯  
笑傲盡日酒盃錯人生何用微名縛洞口獨立俯空壑  
四顧寥寥天地濶醉來呼童尋別洞且向青山覺大夢  
紆迴屈曲入地中洞門誰著白雲封從此穿洞尚三里  
夏日洞陰盡積水洞中變幻狀萬千無能入洞採奇美  
洞門高處昂石鯉青首黃鱗誰所使下有屹石成昂龍  
魚龍飛躍海山宮入山未深情未已直待冬清窮到底  
手探月窟攀天根足跨石龍採玄米耳目軒豁得未曾

下視塵寰皆敝履但得名山縱竒探何用五湖追范蠡  
閱鎮峽堡次韓襄毅韻

陳宗夔

前七十年藤峽勦韓公之功真絕少後七十年弩灘平  
蔡公之功亦非小灘連峽險反側多倏忽黎民倏夸獠  
攻城劫寨寡寧日老稚晨昏不相保憶從憲廟初登年  
蠻獠稱兵正雲擾韓公被命震天下力抵浮言決征討  
文臣武將一時聚整整堂堂復強矯層嶙已見應機開  
雙髻從來乘虛搗須臾列盜盡俘滅萬姓稽呼角崩倒

雷轟決裂破昏晦雨溢淋漓焦稿平開戍壘江流通  
免窟鯨波靜如掃丁男始出把犁鋤婦子纔喜懷乳襖  
自從韓公奉凱還營壘又見生机草碧灘灘寇復猖獗  
據險負固稱天造籌邊念切司馬憂分兵亟上潯陽道  
一朝夸寇復殲決撫散餘徒橐弓早戍樓重立鎮江郭  
郭外新民漸馴擾若教防禦盡如今百粵封疆百年好  
吁嗟乎韓公往矣蔡公歸西土歌思思未了巡行愧乏  
靖邊猷伸紙裁詩慚二老



粵西詩載卷八

欽定四庫全書

集部

粵西詩載卷九

十

詳校官庶吉士臣瑚圖禮

員外郎臣牛檢文覆勘

總校官庶吉士臣朱 鈐

校對官庶吉士臣吳裕德

謄錄監生臣沈希曾



欽定四庫全書

粵西詩載卷九

桂林府通判汪森編

七言古

。 藩使喬公招陪學憲劉公飲灘山閣上醉歸作歌

爰記其事

張鳴鳳

喬公愛士復愛奇傍巖置酒新春時風狂欲撼山頂墮  
濤怒難撐崖脚危嬌鶯當樹不敢顧大魚窺人似相忤

恰愁閣折潭更深那畏貂穿寒已屢公方離席眺前川  
憲使憑闌指顧間乍喜羣峰凌暮靄勿驚片月度澄灣  
此時然燭呼五白酒酣忘却風波劇留連且待須臾懽  
禮數安知許多隔不見從來謝傳賢遭風嘯詠海中船  
兩公襟度亦如此應恕張生醉後顛

自木龍渡浮江而下過還珠感伏波之事作還珠  
歌

渡頭水深百餘尺洞門落照涵波碧人言下有支機石

定是織綃之洲客。徃徃珠光謝旁磧。誤道曾傾浮海舶。  
梁松小兒口多螫。朱勅書生訟徒劇。將軍心事隨已白。  
帝舅列侯何赫赫。悲哉巧舌銛如戟。況復孤臣屢經謫。  
呼兒把酒酌烟波。歌以還珠感今昔。

棲霞篇

并序

俞安期

棲霞篇為棲霞洞作。洞在七星山半七峰參錯離列。  
洞亦迂曲盤旋。蓋穿亘七星而行。其腹中約七八里。  
遼遠冥冥。瑋怪萬象。啟堂皇。支樞柱。中有佛老二像。

羽則鴻鵠介則龜龍毛屬則鱗鱗屬則鯉屏帳旂幢  
璆石鼓鐘花卉珍異咸是膏乳所成為桂諸巖洞之  
冠張羽王志桂勝嘗首譽之以乏班張左陸盛藻發  
其靈祕僅有宋季諸作為憾余以退之汝成二王孫  
導遊撫其實際加飾鄙辭組為斯篇殆得十二雖不  
類漢晉諸公弘製頗拾唐初四子之遺羽王其稍能  
釋憾否耶

桂海紀殊域桂林啓神垌山水竭嘉讚巖實侈圖經中

有羣峰列斗象上摹七曜成山形神斤鬼斧構靈窟綠  
塗碧綴開仙庭靈窟仙庭非一所陰深獨有棲霞府到  
如天表叩明堂入似星躔穿廣宇麒麟吞吐黃金鋪龍  
鵠盤迴蒼玉柱毬場舞榭各經途旋室傾宮頻改戶改  
戶經途透紫烟平原曠數何延綿朱泥鑪冶鍊藥地球  
沙阡術分區田紫蓋挺芝芝九榦絳雪成丹丹九還瓊  
實青柯積乳液瑤瑤瑤碧葉滋膏泉乳液膏泉結奇傀變  
態續紛難具擬誰謂雕屏百堵非競言黼帳千重是迴

頭毛寶左顧龜振鬣琴高上翔鯉東渡神僧趺寶蓮西  
行道士歸仙李別有瑇琳列虞縣帝庭樂器羅鈞天華  
幢九華導飈駕采旂七采迎雲輶孤上金莖承露起並  
垂玉筍排空連南遊萬里航奇客秉燎窺臨每驚魄仙  
偶難逢日月華王孫到共烟霞癖顧影疑過絳氣居起  
名恍隸瑤臺籍詎信青山寂寞區翻藏玄圃繁華宅

海陽三異謠

丁令君民子育老幼熙熙覆華屋淳風舒徐扇邦域致

有嘉祥感羽族咄哉白雉何太馴引雛飲啄遊西牧  
丁令君理冤牘洞開圜扉放疑獄怨氣紛紛散邦國致  
有嘉祥感鱗族咄哉盆鯉亦有神化作飛龍脫魚服  
丁令君去害馬孰敢依馮城社下暴夫驅走出提封猛  
獸驚啼散郊野咄哉猛虎遲渡河楊千寺前遭鬼打

陳望父別駕邀飲蒼梧酒紀以短歌

潯州別駕武陵客遷官歸來舟最輕鬱林之石載一片  
蒼梧縹清仍數甕甕中浸以桑寄生粵中此酒古有聲

味如甘露微帶冽色似玉乳還加清碧沉一盞纔傾後  
芳液流涎滿吾口多粘太淡殊厭斟萍實傷甘不思剖  
蘭生百末法不存余之所嗜差可論安家二泉之新釀  
魏郡易水之上尊二酒輕滑亦足比意外風味寧相似  
新豐平樂傳紛紛一斗十千浪言耳

蒼梧行送沈道徵參知

九疑南去蒼梧丘重華巡後歸中州牛女北來野垂盡  
鬱黔南瀉江分流地連五嶺多巖竇雨暘寒燠稱殊候



九月惟看月似霜一冬不斷花如繡由來風氣稍雜夸  
跣行鼻飲還蹲踈女兒晝挂金錢舞嬾童夜捧蘆笙吹  
更有獠人便騎射輕生每獵孤城下賦稅寧來大國供  
衣裳未習明王化分藩此去今屬君虎牙高建蒼梧雲  
車書試使通化外萬里安事銅船軍

黃使君邀飲榴陰亭以余不得醉欲倩白將軍為

犄角戲成短歌

昭州太守太無事荷鋤手闢衙東地藝蔬種樹復灌花

千片鮮霞錯青翠我來痛飲榴陰亭光如九枝圍夜屏  
蒼梧縹清恰所好但願在地為酒星對君瀟灑大快意  
百觚千鍾不得醉驚謂酒城不易攻欲乞將軍出飛騎  
君不見漢時落魄高陽生酒徒膽氣縱復橫舌下齊城  
七十二誰言不及淮陰兵

題上林春色卷

關與張

上林邑勝如何上有大明萬仞之高山下有澄江一帶  
之清波游人不敢陟飛鳥不得過古木參天不知數但

見白雲終日護蒼蘿思鄰八角環其後古淶鏤鄒列其  
前縣治屹然當中央層巒怪壁鬱嵯峨南陽有卧龍十  
年在隆中一朝祥雲集扶搖直上太清宮上帝命爾龍  
乘雲下九重簸擊滄溟十萬里復挽三湘洞庭之湖水  
南踰五嶺入蒼梧遙望上林而至止上林久旱望甘霖  
甘霖不至民何心雲一起兮枯槁生雲再起兮龍再吟  
雲三起兮四郊足雲四起兮膏澤深轟雷聚石颺颺奔  
洪崖下瀧瀉飛湍和風鼓處庭花茂甘雨來時徑草春

春色僻饒上林苑  
野老行過粵水濱  
雨師風伯安其位  
勾芒上天告上帝  
上帝謂龍功不細  
余將命爾遊天庭  
坐令四海沾天惠

題上林春色卷

王一岳

獨龍駕馭扶桑曉  
一掬陽和噓四表  
海上炎州紫瘴消  
上林春色增多少  
琪花瑤草鬪嬋娟  
美獸珍禽侈品藻  
康衢擊壤樂陶陶  
鼓篴鳴絃春皞皞  
或從水底鋤青雲  
或向星前犁七寶  
或橫短笛牛背吹  
或攜卮酒花邊倒

千家似入華胥國八里如登蓬大島憑誰剩得此春光  
都道縣官殊絕好刑輕賦省法不苛寇息年豐更不噪  
五年幸有生民樂今日歡迎春夢擣吁嗟有此安樂郊  
恨我當年來不早世間何處覓龔黃嶺表從今歌洞獠  
玉屏此日姓名題堂蔭千年天地老慙非山斗自支頤  
幸與驊騮同一皂詩新幾欲鳴盛美才乏相如殊草草

上林吏隱歌

五嶺由來炎瘴方上林之地更幽僻雨霰冥濛掃不開

四壁寒蛩聲唧唧蕭條茅屋兩三間竹樹烟村五六七  
層巒疊翠直聳青霄雲往雲來蔽白日參天老樹虬龍蟠  
澗裏玄猿悲月夕山中野老不記年只看山花為歲歷  
婦持筐篚夫鋤犂南畝東墟各努力陌頭春色歲華新  
男女行歌兩拋擲蓬頭跣足去來忙搔癢持戈當路側  
我挽江流洗瘴氛拔劍指天山破裂千崖豺虎永潛消  
盡掃蠻塵歸統一昔時射策謁金門鵬運九天搏兩翼  
誰知翊羽落大荒驚乘只堪充下樞遙瞻溪表紫流霞

粵鄙微軀抱忠赤公餘閒暇碧槐亭笑領清風卧松石  
有時后圃看奴鋤籬菊蓮池隨意植忽聽林間野鳥鳴  
逶迤小徑蒼苔濕舉頭閩嶠白雲橫鵲鵲原頭胡寂寂  
縱有蘭芽階下生奚似彩舞堂前席我歌吏隱且奈何  
長嘯一聲天地碧

和上林王邑侯吏隱歌

謝忠

州縣拆裂有分土閭閻無民非赤子張官置吏欲何為  
祇欲斯民盡安堵上林僻在粵嶺西民風古陋言侏儻

烟瘴冥濛山水惡峰巒律兇尚崖巖北望長安雖萬里  
盡屬皇明一統裏溥天之下皆王臣林民豈是蠻夸比  
田可耕分塘可漁工商樵牧總相宜比鄰烟火亦相接  
家家稻穀多贏餘邇來頗為征輸苦況復徭蠻肆掠擄  
烟村雞犬漸蕭條廬井田園間荒蕪我侯崛起閩粵中  
才名冠世氣如虹一朝脫屣登雲路直欲乘風步紫宮  
無何捧檄入城郭銳志為民除殘蠹干將一試虎狼馴  
霖雨一施禾黍渥百年積寇蠻瘴消八里生靈頌聲作



郎星尚擬作台星  
鸞刀且作牛刀握  
枳棘豈為鸞鳳棲  
龔黃須入循良軸  
高堂戲彩時或違  
異日褒封榮亦足  
底事年來式作歌  
重歌更隱將為何  
百里豈能伸駿足  
應為餘閒笑傲多  
顧余豈是烟霞侶  
說來更隱猶堪擬  
庭槐日永自交花  
簷鵲春叢空對語  
青衿逐月不徃還  
課畫何嘗污片紙  
既無案牘一勞神  
更何豕亥相洛啓  
曉起偏饒抱膝吟  
午過何妨未梳洗  
有時登眺南薰樓  
有時濯足澄江潁  
有時清夢羲皇上  
有時燕笑松陰底

尸素林庠四載齊笑余吏隱真何比自慚無計附冥鴻  
天涯間散成龍鍾幾欲掛冠向神武誰知未擬開筠籠  
何時獲展飛騰翅兩意憧憧正猶豫山城秋宇雨濛濛  
倏荷中涓持玉至開緘誦讀海天空敬綴俚詞賡佳句

傅氏節婦歌

雲上行

潘郎妻傅姓女潘郎事遠遊空房誰為主傅為婦潘為  
郎客途郎已死空負骨還鄉當時家貧且無嗣白骨蕭  
蕭胡足恃抱骨慟絕幾復甦終求縊死從其夫從容就

縊真難事豈為憤激而捐軀乃知慟欲絕生死已先決  
不忍稱未亡惟期葬同穴天上芳魂翼比飛地下遺骸  
玉聯潔哀怨無勞枝上鵲知心儘有墳頭月月照鵲啼  
年復年萬古綱常日在天世間謾說好男子屈指幾如  
此婦賢婦節臣忠事一體秉彝好德心同然君不見挽  
歌哀些昔連篇至今青史盛流傳又不見邇來國家重  
名節史臣每采陳金闕不徒錫奠與構祠宅里表揚崇  
綽楔吁嗟乎山可頽水可竭此婦身可亡此婦之名不

可減

遊南山

譚耀

南山之高高百丈白雲俯兮飛鳥仰何年造物闢穹窿  
別有世界如壺中鐘乳千秋懸絕壁古磬萬斤掛殘櫟  
流雲石佛半天開雙鯉三清相對立孔道縈紆晝冥冥  
不妨秉燭折腰行行過翠微眺阡陌回首山城烟火隔  
振衣服攝碧淩層大風為洗凡衿塵客子追隨苦未得  
傳經石蹬仍留羣須臾傳入宜仙府奚僮擲石類搥鼓

鼓韻鐘聲相應長笙簧何事奏當場客來漫游知者少  
塵心飛盡蘆蘆表踉蹌日哺駭猿夔浩唱一聲山鬼棲  
開樽對客無爾汝欲倩青萍掛夕暉

全州道傍官松歌

何喬遠

全州官路何逶迤十里五里松參差間桐攢梓相撐薄  
穿雲參天互蔽虧冰霜一道遏驕陽笙簧兩徑吹流颺  
鱗甲老為赤鐵色蔦蘿挂作青蚨枝共言官樹不敢伐  
或有剝蝕無枯皮昔余京師宦六年心愛此樹常攀蹇

報國寺前葆蓋團顯靈宮裏虬龍顛天壽山中  
最蓼莪原廟閤密無繇前誰如此樹看不絕  
行人客子心俱便借問此松何年有國初種  
者章太守古人為政重精詳津梁塗巷皆紀  
綱蔽芾遺思今則亡斤斧且得非時傷嗚呼  
斤斧非時傷我行大江以南不見榱桷與豫  
章

瞻鶴洞歌

有序

宗大王孫所居洞故名仙鶴以其先侯之號  
易為瞻鶴觴我其中命余歌之

桂林諸山多幽奇城內已足歌採芝風洞華景饒雲谷  
清泉白石何離離顧此夸顯人共得東家歌管西家嬉  
宗大君侯居城北平生文雅甘索落一吟一嘯在清林  
前山後山遠茅屋忽從座客見我詩齒頰若不忘我為  
延我屋角一古洞觴我恣我隨所宜此洞空心一石喉  
玲瓏窸窣通上頭梯空穿暝忽高出懸欄虛牖如雲浮  
告我洞名故仙鶴昔人畫形於此琢吾父好之以自況  
我用今名易茲壑層穹厚地一生悲急樹號風豈在目

嗚呼鶴乎鶴乎何處歸千古獨有丁令威君侯日夜想  
音徽載魄通精總不違雖無城郭看是非夢裏飛鳴或  
有玄裳與縞衣

勾漏歌

蘇 濬

息馬山之曲春草萋以綠白雲何意出層巔千峰萬峰  
自相屬數聲雞犬空中聞百丈蛟螭巖際宿山前老叟  
向余歌朔風弄月誰羈束欲訪山翁何處尋笑指松間  
一筇屋當年葛令安在哉片片烟霞出空谷幽枝堪掛



竹皮冠清溪不礙荷芰服珠璣芝田儼相向鳳管龍笙  
斷復續莫問丹砂事有無一醉山中萬事足

王將軍出鎮粵西歌

吳道南

漢室標銅柱宋庭紀武襄君今出鎮地即此舊封疆方  
今四表風塵靜體壯還須察脈病域中露布暫紓馳海  
上風帆難預定念軫邊陲思鼓鼙特命將軍鎮粵西北  
門鎖鑰雖云急南國干城未可稽美材南金并竹箭文  
武元猷茲復見雙蚪斗氣貫長虹三矢天山飛掣電矧

乃詩書卻穀傳何事周南久滯留先幾炳炳占祥怪良  
將拳拳副春求羊城數載新營壘八桂旌旗仍復爾綈  
袍胡床曹國華緩帶輕裘羊叔子謾訝琉球日本依折  
衝樽俎望攸歸中國不虞揚海汎南人猶自憚天威竚  
看託重燕然塞勒石標名勲可再回朝燕喜賜彤弓維  
時孝友侯誰在

朗吟亭

管大勲

北風搖蕩江雲飛與客登山叩石扉寒鴉枯木少人迹

青蛇寶劍長八尺朝從北海過洞庭暮掃蒼烟吹石壁  
吸盡三江無一滴坐看二儀自闔闕世人滔滔名利間  
不如遺落歸深山山中自有仙家樂渴時甘露飢胡麻  
興來醉卧松根石寤覺長天秋一碧吁嗟乎吕仙吕仙  
何處尋環珮飄飄只朗吟

探奇行送爾律出牧宜州

陸鳴和

春風慨然忽攬轡天下澄清行素志萬里驅馳歷百蠻  
置身險峻何傾陂人嫌君道直如弦故把羊腸試一還

豈知君心淡如水百折不回常清泚會看風義振遐荒  
敦修禮樂詩書香雍雍鑄就清和境寧復知身在異鄉  
異鄉風土信何如由來西粵號崎嶇危峰拔地藏巖洞  
自古探奇喜下車奇生寓內何可既火齊木難未足貴  
漫誇威鳳與祥麟琪樹瓊花亦空蔚惟茲萃律嶮嶽之  
奇形偏愜幽玄磊落之勝氣況多貝闕更瑤房丹竈芝  
田仙路長冥搜應得紫青味呼吸將通玄圃堂君不見  
昔日南海鮑太守往來羅浮雙燕偶又不見東方曼倩

生遨遊紫海暨蓬瀛雲嶺霞顛蕩胷目裏羅光怪譜金  
牘瓌麗齊驅馬子長柳家記述猶騰腹採奇探奇意飛  
動鶴背翩翩真足控京輶風塵他自饒烟巒沆瀣吾堪  
弄弄罷還來傍紫宸翻然一笑宜州夢

石梁豹變歌

張自謬

香林書院甫成宜山孫明府更名石梁而適有文豹  
來院傍為莊備戎格之以獻敬賦

石梁主人龍水客石梁書院龍谿脈一脈斯文千古傳

主人直逼蘇黃格黃從蘇出遠來宜天遣涪翁作世師  
榮辱都遺談性命執經滿戶墨盈池妙絕此翁提後覺  
太守丹霞承此學山谷祠崇廟貌新藻句迎神雲漢倬  
奇哉霞翁矯如龍緒餘及物真治躬神遊八極不可從  
至今徒令想流風龍谿故業誰還宗五百年來待岳公  
地因瑞石傍雲峰講堂寢室構于中石梁名院孫明府  
識仁名堂石梁主識仁堂上識主人石梁美號堪千古  
經營更有守戎莊軍令公嚴計日量蕭尹思思遙助力

頓教草昧起明光三公同事若天使石梁公得託終始  
此日公來主石梁喜動諸生隨玉趾仁風當坐共秋清  
時雨更番化欲傾主人德愛真君子獻豹何期應此盟  
大夫華國文原蔚飛將登壇看足貴程度還如廉吏操  
南山霧隱余全未休誇勇剽勢猶螭却與豐狐患有皮  
節著羔裘宜用飾一斑今向管中窺石梁歌歌豹變儼  
然溫厲是主人齊魯至道歸書院

望蒼梧

區大相

白雲遊兮蒼梧山連卷兮路崎嶇日黯黯兮晝多霧巖  
岬嶠兮鬼嘯怒穆蘿翁鬱兮塞往路我欲從之脩且阻  
鴟鵂兮空山帝子去兮不還道遠兮何極不能隨之兮  
淚霑臆涉湘臯兮綠潭悲洞庭兮芳夕踈篴兮斑斑山  
含怨兮水含憶步遠岡兮不見塞夸猶兮難即望蒼梧  
兮白雲隔千里兮思君撫瑤瑟兮寄幽怨採杜蘅兮愁  
氛氲

望八桂



桂樹生兮山南沐玄雲兮蔭芳潭擢脩莖兮幽靄布芳  
葉兮夕嵐發華滋兮秋風翔羣羽兮鷓鴣既拔萃兮高  
嶺復灌生兮玄冬揚芬兮素節含真兮嘉月有美人兮  
傷離孽巖桂兮為期信懷芳兮自保又久要兮申之去  
不來兮來不采芳寂寂兮欲誰待嘉樹茂兮巖間桂父  
淹留兮往還登樓兮長詠望八樹兮杳難攀

太白樓讀王恒叔詩慨然有作因憶天台舊遊劉  
忠父陳大期皆化為異物時恒叔以司諫外補

粵西觀察

何 白

任城落照平蕪夕起酌椒漿呼李白朱甍縹瓦照城闔  
鳥外冥冥遠天碧荒碑斷碣卧林林剝落龜趺黯無色  
孤光忽迸夕郎詩差似寒山一片石憶昔尋君過赤城  
烟濤鼓柁窺東瀛天低海樹殘霞明瀑流喧阗河漢傾  
華頂秀出擢紫清海日欲上天鷄鳴手翳紫芝笑披拂  
瑤臺石室相縈鬱龍墟宵壑石潭寒虎嘯空林山月出  
酒酣起舞歌嗚嗚激賞繞牀敲唾壺劇語蟬聯不知曙

門前楊柳聞號烏我騎白鹿還江渚君向金門謁明主  
謬謬翻令世不容一官遠渡鵝翎浦袖裏空留三載書  
雲中難寄西飛羽陳生劉生倏為鬼撫事悲歌淚如雨  
我聞八桂鄰夸窟勁弩長弓好馳突撫綏須用出羣材  
繡斧煩君開百粵伏波銅柱炯未磨洗兵應惜蠻王血  
念茲夙夕同心期側身萬里令人悲清溪重來亦惆悵  
長江怪底名相思過眼勛名亦如此遲迴莫待車生耳  
早晚相將雙闕問采真共鍊金鵝藥

玉主行

郭正域

閩人林某豪俠士惑志于京倡劉氏傾囊金納之資  
斧頓盡逾時以貧故勸劉且歸劉哭誓死不再嫁林  
別去商于嶺西劉死京邸林聞之匍匐歸痛哭刻玉  
為主題曰劉氏之魂後繫以斷腸曲一首語甚淒楚  
朝夕置懷袖每以示諸交遊後復挾數十金之嶺西  
過大江舟師故大盜殺之沉其屍適閩人某為郡司  
理故習林事一夜夢婦人來訴冤詰旦斥羣吏索盜

獲玉主司理大驚求林屍江中如生遂盡捕羣盜百  
餘家江上以寧此玉主之所以報林也異哉子友葉  
進卿傳其事予為歌之

燕城明月照倡家雙雙好鳥報俠邪劉姬十五顏如玉  
羞殺燕城萬樹花門外紫驕驕叱撥院中綠柳鬬昏鴉  
畫就蛾眉同遠岫傳將輕粉賽明霞裊裊金蓮籠繡襪  
纖纖玉手撥琵琶歌喉宛轉風前度人道千金纔一顧  
綵毬無數任頻拋費盡纏頭不得住林郎個儻七閩客

倒篋傾囊憑一擲松月蕭疎擬性情玉山磊落為標格  
明珠滿斛買名姝奚論黃金與白璧三星耿耿夜迢迢  
結就同心兩脈脈蒸煖金爐透錦衾掩上瓊牕褰襲積  
掛却流蘇露合歡惱殺鳴雞驚寢席願比文鴛兩翼紅  
不念青蚨雙手白年年暮暮復朝朝費盡神錢不可招  
玉壺一破難儲水翠鳥高飛肯顧巢長嘆燈前一杯酒  
莫以紅顏持敝帚山前好問買臣妻風流肯落楊枝後  
劉姬雙淚如紅雨誓死如歸真自許寧為玉碎響璚瑋

肯效萍飄無定所歡聞大笑更何求感卿義重心良苦  
大舸明朝泛五湖燕山楚水又蒼梧千金手在散還聚  
一寸心存去不孤擔簦一去秋闈冷明河夜夜拖金井  
輓轡一轉一含愁銀瓶落下垂空綆臂間破碎玉連環  
房中焚却相思枕落花不顧條上心孤鸞空死鏡中影  
渺渺芳魂逐玉郎客邸聞之真斷腸蒼茫星月關山遠  
黯淡衣裳粉黛香歸來痛哭如荼毒縱有千金難再續  
重泉何以寄悲愁覓得崑山一片玉前寫芳卿小字名

復題腸斷悲哀曲出門繫在綠綺裳入門藏在青羅褥  
相將南北更西東行行苦雨又淒風天涯共踏王孫草  
一似銜蘆隨斷鴻買舟遠向粵西路日沉瘴海青天暮  
鷓鴣啼罷鬼車來四望楓林起黃霧舟師原是綠林豪  
叱咤腰間出寶刀血沉泓碧半江水魂作胥山萬里濤  
蒼梧使者七閩才兒戲曾同竹馬來郡齋夜半醒不寐  
恍惚如聞窈窕哀蹒跚搖曳不成步唧唧切切如泣訴  
朦朧玉貌未分明似語無聲總不平詰朝驚起問羣吏



天道神明似有情樓頭鼓響傳行馬伐鼓鳴鉦搜四野  
怕有赤丸暴客多能無白晝殺人者黃昏鬼哭大江頭  
含冤寧是婦人也邏卒倉忙鎖賊奴雕頭梟眼狠而粗  
階下片言情自吐不俟囊頭五木呼賊奴住在山之谷  
檢出崑山一片玉前寫芳卿小字名後題腸斷悲愁曲  
使君慣見眼模糊咄嗟此物何為乎夙昔少年同里閨  
鍾情曾有酒家胡試向江頭問水濱鼉室蛟宮出故人  
水底炎天經半月頭顱面貌儼平生玉山磊落依然在

松月蕭疎尚有真使君痛哭停丹筆覆盆之下青天出  
縛盡賊奴幾百家霹靂虛空驚白日從此江頭犬不聞  
妖氛散盡無愁雲分明曉夢冤魂出死別吞聲上帝聞  
昔日玉顏今玉主今日報仇昔報恩

桂嶺守歲效李長吉體

王士性

街鼓逢逢催曉急家家椒柏春風集傾盤剪勝百事新  
昨夜神茶爐中泣朝行紫海暮歸疾母道經年兒半日  
兒女催人攜老至百年轉盼須臾事蒼梧夢斷紫筠斑

石墮湘流去不還無計聖賢能守此年年草色自江關  
坐來兼憶麻姑別東海飛塵白如雪

謁柳柳州祠墓

天寶貞元人已死千年大業竟誰是手提大冶鑄乾坤  
後來共說河東氏並轡中原有幾人愈也角立河之濱  
百川却障狂瀾折風雨延津會有神解道河清苦難俟  
瞥驚白日風塵起去國投荒十二年驅鱷開雲八千里  
魑魅蛟螭作比鄰強開閭閻就陽春耐可呼天作知己

詎知天意難具論刻物肖形神理在尺管疇令握真宰  
爾曹自取造化忌天死災荒託蓬壘侯死較先韓較後  
羅池之碑及韓手教氏春秋鬼不饑桐鄉丘隴人應守  
潯水南流即舊津黃蕉丹荔伏猶新手披蔓草荒祠下  
余亦東西落魄人

弔劉參軍黃墓

劉參軍獨鶚啾啾百鳥羣長鋏倚天氣吐雲巫咸不下  
霄漢遠淚斷杞國人無聞欲抉靈壺上天門虎豹信信

坐九閻玉女投壺笑方劇衆星爭月光猶繁且招龍比  
遊地下萬里投荒奄墮馬湘流東去鵬南來長沙弔原  
君泣賈生慚借劔阻尚方死願裹屍棄中野雄虺封狐  
任九頭魂招不來粵山赭劉參軍青山瘴癘多風雨化  
碧啼鵲一坏土土偶何知便是君請看生氣摩靈氛

栖霞洞

伏波山前桂樹林伏波山下灘江深八桂掃天不見影  
七星墮地成瑤岑倒植雲根覆地肺瞥然有洞窺江心

上列星樞懸法象下剗石脈倚崙嶽束炬照天行白日  
噫氣淅澼吹衣襟龍門千尺玄鯉躍天關三疊賴霞沉  
寒巖六月不知暑處處鍾乳如懸針湘靈合掌布袋笑  
獅象駱駝爭獻琛金山瓊海勢蕩滴萬古石髓堆至今  
更有怪石亂相蹲禪牀不動禪房陰巖縫突出巨靈手  
杖底似聞鐘梵音幽壑風生虎豹踞寒潭水冽蛟龍吟  
飛走萬靈無不有首垂鼉鼠綠蚪蚪蒼蘿高掛日月昏  
顛崖中斷風雷吼乍見明星出海樹驚起栖鵲號鬼母

何年六甲操神符手弄雙蛇開戶牖豈是媧皇煉石處  
石裂天傾逗江口區區三十六洞天索遍道書藏二酉  
誰為遺此落人間夜夜流霞光射斗

玉主行

徐 勣

林丙卿福清人生平倜儻好遊俠邪遇當意揮千金  
不顧劉姬鳳臺者年十五有聲教坊貴遊爭慕之姬  
不與狎一見丙卿驩甚託以終身丙卿破數百金納  
為妾久之丙卿遊吳越間道聞姬死慟哭幾絕疾馳

抵燕日夜哀痛刻玉為主提攜不去左右為賦長短句題玉上曰入時倒郎懷出時對郎面隨郎南北復東西芳草天涯堪遠遍勝寫丹青圖勝妝水月殿玉魄與香魂都在此一片願作巫山枕畔雲願作盧家梁上燕莫似生前輕別離教人看作班妃扇歲丁酉丙卿去燕復遊西粵僦舟東下為舟人陳亞三所殺沉其屍於江掠其貲以去蒼梧林司理丙卿友也半夜忽見婦人稱冤狀因呼邏卒嚴捕禦人者卒搜亞



三橐得玉主司理大驚窮索餘黨伏辜求得屍顏面  
如生肌肉不損觀者異之葉太史傳其事余為作玉  
主行

燕山幻出蛾眉質翠羽鳴璫金屈膝就中百萬倚門倡  
若個輕盈稱第一傾城少女長劉家十五妖嬈未破瓜  
到處名姬羞粉黛一時佳冶避鉛華櫻唇半啟飄金縷  
百轉嬌喉鶯乍乳間拂朱絃奏鳳凰時拋紅豆調鸚鵡  
對客閒參湖上禪桃花重製蜀中箋芙蓉學繡相思枕

榆莢羞看買笑錢五陵俠客紛無數爭進千金求一顧  
妾貌雖同解語花妾心已作沾泥絮風流閩海說林郎  
年年曾登遊冶場黃金盡買纏頭錦贏得聲名遍教坊  
明珠欲換娉婷女金谷園中貯歌舞滿眼無人荷目成  
劉姬一見心相許結束驩然出俠邪九枝銀燭七香車  
鴛鴦忽比雙飛翼箇箇俄開並蒂花珊瑚寶玦流蘇帳  
蜀錦紫絲縈步幃占斷春風歲復年秦箏趙瑟搗相傍  
可憐行樂在須臾夫壻長遊入五湖膏沐懶施雲鬢亂

空牀獨守夜燈孤春花秋月無情去誤妾佳期等閒度  
婉意柔情孰與伸千愁萬恨憑誰訴明河耿耿路迢迢  
望絕音書歎寂寥紅頰每於愁處損朱顏多向暗中凋  
思君不見令人老柳葉雙眉畫慵掃香魂渺渺落黃泉  
玉骨累累瘞芳草人傳消息五湖西夫壻傷情掩面啼  
碧沼遊魚垂比目雕梁飛燕失雙棲哀絃聲斷絲難續  
死別生離成一哭沉思無計表深情售得連城舊明玉  
磨礪朗潤復輝光賦得悲哀句短長中間自鏤芳卿字

未下金刀先斷腸錦囊裝貯殷勤記鎮日重重牢繫臂  
東西南北但身隨旦夕何曾暫相離攜向蒼梧萬里遊  
逢人開取淚先流鷓鴣叫月悲長夜蛤蚧鳴風感素秋  
江頭忽遇探丸客化作杜鵑歸不得黃昏野魅泣精靈  
暮雨遊燐啼怨魄玉主漂零何處歸芳魂長繞粵江飛  
夜臺飲恨重相見朽骨含冤事已非蒼梧司理眠官閣  
忽覩仙姬來綽約含怨含顰若有詞半羞半怯如相託  
索索陰風毛骨寒分明環珮韻珊珊漸聽鳴咽聲初遠

起視星河漏欲殘心知非幻仍非夢定有幽魂抱深痛  
綵線縫裾獲赭衣驟看玉主神驚動由來此物屬林郎  
刻玉題詩為悼亡珍藏久識依懷袖流落何因在異鄉  
傷心細向公庭鞠舊鬼呼哀新鬼哭始覺孤身入虎牙  
更悲俠骨填魚腹詎信蛟龍不忍吞隨波逐浪幾朝昏  
千秋重閱曹肝事九辯難招屈子魂吁嗟此事何奇絕  
名姓從茲播西粵真迴白日照重泉果有嚴霜飛六月  
片玉堪將恩遇酬生死肝膽在紅樓方知白璧能伸恨

不獨青萍解報讎

答贈粵西大將軍王宛委見懷之作宛委書來有

懷將母思吏隱白門故云

范鳳翼

我所相思在西粵萬里馳書歲三發桂林荔水隔蠻烟  
離尤空付天邊月各天相照肝膽真子孝臣忠交一身  
臣義安逃天地外何得妬我江湖人頃復貽我琅玕字  
啟函盡說心頭事銅柱功名若等閒三山二水思仙吏  
雖復名成燕石勲老臣何忍負吾君正提閫外熊羆旅

莫問山中猿鶴羣

遊桂林諸山

吳鍾巖

我昔遊黃山其奇不可說中無塊土純以石稱絕烟霞  
猶秘丘壑間未若粵西諸峰巖洞奇奇怪怪忽從平地  
設洪荒開闢何許久千載風流柳州柳我亦來茲八桂  
堂蕭條異代夫豈偶跋涉山崖與水濱朝朝暮暮思湘  
雲果然一見快知己各各突兀崛起不肯遜迨卑伏下  
與培壘羣從來山水多畫圖十日常不孤至此如

旗如鼓如屏如扇如簪如筆羅列几案丹青無長松短  
松鬱盈望近郊石流可塞裳桃李正開沐霖雨土膏已  
發農漸忙四顧喜得未曾有咄咄逼人駭走却還再  
拜問山靈山靈唯唯復否否世間諸見目為障遂使平  
奇見兩相見奇見慣奇不奇奇中見平亦奇狀何如仙  
人空中有樓閣往來乘雲駕雲鶴下視奇平不足論手  
攬星辰坐碧落五丁仰見欲顛仆移山西來繞榕樹紛  
紛亂墜壓奔流衝擊噴薄灘聲怒洞門深黝若室屋石



乳飡之可辟穀壯哉雄視灘水濱風波何必嗟沉淪世  
眼眈眈注金玉解得看山有幾人芙蓉朵朵錦片片千  
回萬回無數轉我我獨秀鎮王宮蒼翠丹黃撲顏面七  
星疊彩奇未已愈出愈奇難肖擬疑是神遊非想天憑  
虛可勾銀漢水伏波試劒呼俊傑延之讀書此怡悅昔  
人見賞杜陵翁地遠繁繞祇藏拙五嶽欲周今老矣一  
官半局非吾意對此嶙峋差散懷飛揚叫笑偏生致山  
靈何不將石鞭盡驅百蠻就擒捕使我覩所未覩經未

經山靈謂吳生六合之內六合之外奇怪無窮無盡爾  
安知

張義姑辭

陳繼儒

有雛有雛六歲而孤無怙無恃如委道塗張氏垂絕可  
奈何可奈何義哉姑處子不嫁之死靡他不願為鳳凰  
翱翔井邊梧不願為鴛鴦遊戲水中蒲但願雛長成身  
作白頭烏青春逝清夜徂抱兄子淚血枯爾寒我襦爾  
饑我餬授爾句讀愛爾髮膚娶婦生兒美且都孤兒活

不知無母室女老不知有夫險哉一縷千鈞扶程嬰李  
善何難乎吁噓兮巾幗男子粉黛妖狐汝獨不聞桂林  
張義姑

經略臺懷古

區龍禎

越南西去古銅開牂牁之水何年至別有繡江遶故臺  
臺自開元間樹幟南屏矗矗都嶠君大容虎踞並超羣  
劃成千古英雄地往事升沉悵夕曛駱駝壩龍巷軍九  
派滙師武臣當年節鉞知誰在五莞芳名今尚聞間有

漫叟為元氏輕裘緩帶羊叔子文章已擅盛唐名南海  
泱泱分賜履忽憶蓮湖面面亭風流易盡留芳芷行塵  
不隔荔枝紅楊灣尚在楊妃死地靈人傑總一時銷越  
歇晉干江裏由來荒裔亦無常一枰碁局等同戲倏忽  
遊移數百秋山城遼絕如斗寄人風遐想京洛遺炙踝  
文身差可異變閩化蜀總何人海濱鄒魯寧殊地曾不  
見濯纓石釣魚臺千年人去鶴歸來南山壁立還相對  
江流不盡邇復洄勛名幾度成消長徙倚城頭玉漏催

濯纓石

江邊一片石何人向濯纓只見江邊石不見石上亭怪  
哉此石貞如沆不在滄浪在烟瘴太華蓮岳未許扳羅  
浮日觀差同尚豈謂生來自他山不用為錯寧為碣纓  
纓紆綬等閒看誰纓誰足宜無妄臣門縱如市臣心終  
如水邛反隔芳洲牽情隨葛藟瞿塘灩澦大如斗寧知  
此石亦中流寄語沙棠維楫者放歌石上一虛舟

棲霞洞

曾日章

棲霞七尚相鉤環回視八桂為名山日華月華不可見  
高風萬古應難攀遂聲吹徹空濛裏仙酒何人識甘旨  
偶遇樵者得佳名碧空之樂真無已秋香桂子風蕭颼  
我陪內侍成遨遊題詩洞口紀歲月應與鸞鶴千年留

題勾漏洞

尹宗珂

我生本有山水趣妄想忽落利名間簪紳縛人等羈紲  
歲晚不覺兩鬢斑牢落離家知幾載問我蹭蹬何當還  
驅車道出勾漏洞尋真訪隱聊開顏丹竈刀圭豈易得

止恐石髓成堅頑  
雲霞抹空覆聖境  
鐘磬發響鳴深山  
仙蹤流傳在指顧  
捫蘿上石誰能攀  
人求丹砂得白石  
仙分應無那得餐

粵西詩載卷九